



Sr. U. M. Arends

Ministro di Integridad, Naturalesa, Transporte y Cuido di Tercer Edad  
Oficina di Gobierno  
Oranjestad  
Aruba

25 di juli 2023

**Tema: Recordatorio pa reacshon riba carta manda dia 21 di maart 2023**

Apreciado Sr. Arends,

Dia 21 di maart ultimo (esta mas di 4 luna pasa!) nos a manda varios carta cu petishon/proposishon pa medio di Bo mail. Mesun dia mi a entrega tur documentashon personalmente na Bo consehero, Sr. Carlos Guiamo. Esaki mi a haci en bista cu despues di e cancelashon na ultimo ora riba dia 27 di februari sin ricibi algun invitashon pa otro encuentro despues, mi mester a biaha pa exterior pa un tempo largo.

Lamentablemente no tawatin ningun reacshon riba e cartanan. Esey ta hopi straño, tumando na cuenta cu ta trata di tema cu Bo propio partido a boga p'e prome cu elecshon (esta bon gobernashon den tur sentido) y cu ta trata di asunto cu ta cay especialmente bou di Bo cartera. En corto, y pa refresca memoria, ta trata di lo siguiente:

- 1- E carta na unda ta boga pa gobierno pidi excusa pa decada di malgovernashon, locual a causa un debe y pago di interes practicamente inpagable. Esaki ta un obstaculo importante pa un desaroyo sano di Aruba mientras cu tur ciudadano ta carga un suma substancial di debe riba su lomba. Tur gobierno cu a sinta, irrespecto su color politico, a haci su mes culpabel na patronahe politico cu consecuencia financiero desastroso pa nos pais. Hunto cu e cantidad di caso di corrupshon cu a tuma luga na Aruba, esaki ta motibo principal di e falta casi completo di confiansa den gobernante/politico. Pesey ta na su luga pa gobierno reconoce e mal gobernashon cu a tuma luga y ta pidi publicamente excusa pa locual esaki a causa pa pueblo di Aruba. Si nos no ta ekiboca, Bo partido a lanta hustamente pa combati mal gobernashon y realisa bon gobernashon!
- 2- E carta cu e tema di e acuerdo di LNG locual ta duna e impreshon fuerte cu ta trata di un caso di nepotismo riba alto nivel cu e posibel intenshon pa saca probecho personal di un embergadura financiero inmenso nunca antes bisto na Aruba. No ta por nada cu tanto e dos ministronan y e dos parlamentarionan di Raiz a abstene nan sosten di e proyecto di LNG. Den e cuadro aki ta indispensabel cu Bo persona como ministro di INTEGRIDAD (!!!) duna publicamente mas claridad al respecto.
- 3- E carta tocante nombrashon di personal ta un proposishon cu e potencial pa elimina un di e facetanan mas dañino di patronahe politico. Ta trata di un proposishon di parti di Sindicatonan Uni na aña 1995 pa caba cu e maneho irresponsabel di personal di parti di gobierno. Sin mas un condishon pa realisa bon gobernashon!
- 4- Prome cu esey nos a entrega un proposishon cu informashon extenso tocante un 'panel di ciudadano' pa yuda realisa e 'democracia participativo' cu tambe ta un meta importante di Raiz.

Nos ta spera cu e biaha aki y dentro di poco nos por spera un reacshon al respecto y/of un encuentro personal.

Atentamente,

Na number di SDBA:

Armand Hessels  
Presidente

Anselmo Pontilius  
Secretario

Cc: Parlamento di Aruba